



28. juni 2024

UKA2024/97

Matumuuna Inatsisartut suleriaasianni § 33 najoqqutaralugu aalajangigassatut siunnersuut imaattoq nassiunneqarpoq:

Inuussutissarsiutigalugu aalisartunut piniartunullu inuussutissarsiutigalugu umiatsiaararsinissamut inuussutissarsiornissamut tapiiffigititalernissaat siunertaralugu, Aalisarnermik piniarnermillu inuussutissarsiutillit inuussutissarsiorterannik siuarsaaneq pillugu Inatsisartut inatsisaata allannguutissaanik Naalakkersuisut siunnersuuteqarnissaannut peqquneqarnissaat Inatsisartut aalajangiiffigisassaattut siunnersuut.

(Inatsisartuni ilaasorta, Jens Napaattoq, Naleraq)

Tunngavilersuut:

Naluneqanngitsutut siusinnerusukkut Inuussutissarsiutigalugu tapiisarneq – ESU-lån – aalisartunut piniartunullu iluaqutaasimasooq atuussimagaluarpoq, ajoraluartumilli tamanna massakut atuukkunnaarnikuuvoq.

Tamanna Grønlandsbankenip erseqqissumik aalisartunut umiatsiaararsortunut taarsigassarsisitsineq tapiissaarnini unitsinnikuullugu nalunaarutigereermassuk ajornannginnerulersimangilaq pitsanngorsimananilu.

ESU aqutigalugu taarsigassarsiniarneq periarfissaajunnaarmat aamma aningaaserivimmit taarsigassarsineq unitsinneqarmat aalisartut piniartullu amerlasuut pitsanngorsaanermut ineriartortitsinermullu aamma angallatimik taarsernissaannut, motorip taarsernissaanut il.il. periarfissaarutsinneqarput, naak piniarneq aalisarnerlu nunami maani inuussutissarsiutit pingaarnersarigaluaaraat, tamannalu Naleqqap isornartoqartittorujussuuaa.

Ilumoorsinnaanngilarmi nunami inuussutissarsiutit pingaarnersaat aalisarnermik piniarnermillu pissutsit pitsanngortinnissaannut ineriartortitsineq mattunneqarsinnaappat?

Nassuerutigineqassaarlu ullutsinni aalisariutit amerlasuut pisoqaavallaalersimani aamma pitsanngorsarnissaannut taarsernisaannullu pisariaqartitsineri. Taamaattumik siunnersuutigaarput aalisartunut piniartunullu ESU-lånimik taarsigassarsisitsinnaaneq ammaateqqinneqassasoq, tamannalu inuiaqatigiinnut tamanut iluaqutaassaaq tassami inuussutissarsiut pingaarneq eqqartorneqarmat.

Upernaaq 2024-mi inatsisartut ataatsimiinnerani oqallisissiatut eqqartorneqarnerani (UPA2024/90) partiinit tamanit taparserneqarpoq, taamaammat maanna aalajangiiffigisassatut siunnersuutit qaqqinneqarpoq.



Naleraq

Pisortanut aningaasaqarnikkut allaffissornikkullu kingunerisinnaasai:

Siunnersuut akuerineqassappat pisortanut ½ AC-årsværkimik aningaasartuutigineqassaaq. Konto 51.07.40 Taarsigassarsisitsinerit erniaqanngitsut taarsersugassaanngitsullu 2020/21-mi aningaasaliisoqarsimavoq, tassani aningaasaliineq 8,4 mio. kr. amerlassuseqarluni. Siunnersuut akuerineqarpat aningaasaqarnermut inatsit aqqutigalugu aningaasaliisoqassaaq takuuk Naalakkersuisut akissutaat.¹

Inuussutissarsiortunut aningaasaqarnikkut allaffissornikkullu kingunerisinnaasai:

Siunnersuut akuerineqarpat aalisartut piniartullu inuussutissarsiuutsik ineriartortissinnaavaat pitsanngorsarlugulu ESU-lånimik taarsigassarsinikkut,.

Innuttaasunut aningaasaqarnikkut allaffissornikkullu kingunerisinnaasai:

Soqanngilaq.

¹ [023_2024_esu_jnapp_akissut.pdf \(inatsisartut.gl\)](#)